


JABUETSUATIQUE DIUSU SA MIMI

NUEVO TESTAMENTO Jesucristo II



JABUETSUATIQUE DIUSU SA MIMI

NUEVO TESTAMENTO Jesucristo II

TACANA



en colaboración con
El Instituto Lingüístico
de Verano
Cochabamba, Bolivia

Impreso por CALA - La Paz , Bolivia

febrero, 1984

300

AGRADECemos
a
David C. Cook Foundation
Elgin, Illinois, E.U.A.
quier nos ha provisto con
los dibujos.

y a

La Liga Bíblica del Hogar de Canadá
por su contribución
para la publicación de este libro.



Beni, bai Jesús sa jacuatsasiati id'abataidha.

Mimameque Mateo 8.23-27; Marcos 4.35-41; Lucas 8.22-25.

Piada tsine Jesús mesa discípulo cuana neje canoa aida su nubitaidha bai aida yanipetu puji. Jesús jaduitijiji putsu, canoa tiani su satidha etahui puji. Yanipetutasa cama, beni jubida pupiruidha. Discípulo cuana ebia su rubutanataidha, canoa nubi pepe putaidha putsu. Daja biame, Jesús tahuisaderaidha. Chamacama Jesús id'edeataidha huecuana. Uja ataidha huecuana Jesús:

--Echua Puji, ehuidi da ecuaneda.

Da su Jesús, neti putsu, beni, bai d'ayataidha. Mitanaque yatani hora su beju beni, bai mitanaidha. Da su Jesús ja discípulo cuana uja ataidha:

--¿Jucuaja su micuaneda erubutanani? Aimue micuaneda
Diusu peje su enimetucheatiani mahue ebainia.

Discípulo cuana ebia su nimetiutaidha, Jesús ebia su tucheda bataidha huecuana putsu. Beni, bai tusa jacuatsasiati id'abataidha bataidha huecuana.

1. ¿Jucuaja su Jesús canoa su tahuidha? _____
2. ¿Jucuaja su discípulo cuana rubutanataidha? _____
3. ¿Aiya patsahuata bajataidha huecuana? _____
4. ¿Aidhe da beni, bai ebia su tucheda eni? _____

Jabuetsuatique versículo Lucas 8.25.

Mimiameque Mateo 9.19-22; Marcos 5.24-34; Lucas 8.40-48.

Piada tsine Jesús, discípulo, pia cristiano cuana neje epuneje nedaji esa ete su eputahu su, piada epuna ja Jesús sa ejud'iji d'apabataidha. Tueda epuna jucuada mara mue mesa ami netiti puidha. Pamapa mesa chipilu jaiduenetiji cuana tiapetaidha biame, mue saisi. Jesús ja jia ema saisiameta cua pibataidha biame, iyuame puidha tu equisaba puji. Da su pibataidha epuna:

--Jesús sa ejud'iji yama d'apaba putsu, ahua ema saisi cua.

Da su Jesús naria putsu, epuna ja tusa ejud'iji etihue d'apabataidha. Da hora su epuna saisienidha. Jesús aiya tu ed'apabatani shanapataidha su, jababarereatidha.

--¿Aiya ema d'apabataitia? --quisabataidha huecuana.

Da su epuna eriariani je, Jesús butse su tururu putsu, quisapetaidha. Jesús ja uja ataidha epuna:

--Mida ema peje su jei puitia putsu, saisitia mi beju. Puchiditiuque mique ete su.

1. ¿Quepia Jesús cristiano cuana neje putahuina? _____

2. ¿Ai epuna sa neda puina? _____

3. ¿Jucuaja su mue baja epuna ja Jesús tu pasaisiameta puji? _____

4. ¿Cuaja saisiamame puidha epuna? _____

Jabuetsuati que saida versículo Lucas 8.25.

Mimiamque Mateo 14.1-12; Marcos 6.17-29.

Juan Bautista Jesús jepuiti quisaquisa puniunetidha. Juan ja echua puji Herodes satseataidha, Herodes mesa edue sa ehuane Herodías neje anidha putsu. Da putsu, Herodes ja Juan teriichanubiametaidha. Herodías ja Juan ebia su judubataidha putsu, manuameja ataidha. Daja biame, cuaja manuame taji mahue bataidha. Echua puji Herodes ja manuameja mahue ataidha, Juan deja butsepi puina putsu. Chamacama Herodías ja cuaja Juan emanuame puji pibataidha. Herodes sa tsine su Herodías ja mesa ebaquepunabeitutaidha Herodes butse su tu mehua patiritiri puji. Herodes sa ebia su tsada puidha putsu, uja ataidha epuneje:

--Ai mi ema ebaja yama mi etia.

Epuneje ja --Juan sa echua dhepe su tiaque ema --bajataidha.

Da su Herodes ebia su jatacuamadhatidha, Juan manuameja mahue ataidha putsu. Daja biame, chuarijimetaidha Juan. Tusa echua epuneje tiataidha. Daja Juan manume puidha.

1. ¿Aidhe jepuiti Juan quisaquisa puidha? _____
2. ¿Aiya banime puana Herodes sa epuna? _____
3. ¿Aidhe tiritiridha Herodes sa tsine su? _____
4. ¿Cuaja Juan manume puidha? _____

Jabuetsuatique versículo Mateo 11.10-12 cuaja Jesucristo puidha Juan Bautista jepuiti.

Mimiamemeque Mateo 14.14-21; Marcos 6.30-44; Lucas 9.10-17;
Juan 6.1-14.

Piada tsine Jesús ja dueji cristiano cuana buetsuataidha bai aida maje je. Dapia pishica mil ejaitiana cristiano cuana anitaina. Pamapa tsine Jesús id'abataina huecuana. Da su tsinecua su discípulo cuana ja Jesús uja ataidha:

--¿Cuaja ni da ecuaneda ye cristiano cuana mihuapeme a cua?

Da su Jesús uja jeutsutaidha huecuana:

--Micuaneda hue memihuaque huecuana.

Discípulo cuana ja uja ataidha Jesús:

--Aimue detse ecuanaju mihuape cua mahue, jucuada ta huecuana putsu. Tupu mahue ecuanaju sa chipilu. Hue upia yani quimisha pan chidi, beta se chidi bahui piada edeahue ja dusetaitia.

Da su beju Jesús ja cuatsasiataidha cristiano cuana nutsa bia su paaniuteta. Edeahue bajataidha pan, se chidi cuana. Tueda ina putsu, diusulupai Tata Diusu ataidha. Pan, se cuana ped'uped'u a putsu, discípulo cuana tiataidha cristiano cuana paberereatiata huecuana puji. Beju nimetiuda aida puidha. Quimisha pan beta se neje Jesús ja pamapa tueda cristiano cuana mihuapetaidha. Tupu diadiataidha huecuana. Da su piada tunca beta ejaitiana d'iti cuana sejeataidha huecuana puchu cuana neje.

1. ¿Jucuaja su discípulo cuana pibapibataidha? _____
2. ¿Quejucua cristiano cuana anitaidha? _____
3. ¿Ai edeahue sa anidha? _____
4. ¿Ai nimetiuda aida Jesús ja ataidha? _____

Jabuetsuatiqe saida versículo Mateo 11.10-12.



Mimiamemeque Mateo 14.22-33; Marcos 6.45-52; Juan 6.16-21.

Piada tsine Jesús ja mesa discípulo cuana mecuana sa ete cuana su beitutaidha bai aida chu maje. Jesús mu u maje anidha Tata Diusu neje emitsuti puji. Discípulo cuana yanipetusa cama, beni jubida pupiruidha. Pamapa dhidha discípulo cuana tarutarutaaidha, beni ja ena jubida dhapujutaidha putsu. Apudaya eni eni su discípulo cuana Jesús ena bia je yasesiu bataidha. Ebia su rubutanataidha huecuana, Jesús enid'u pepe hue putaidha putsu. Jesús ja uja ataidha huecuana:

--Ema hue. Be merubutanaji.

Da su Pedro ja uja Jesús ataidha:

--Ahua ene mida su, d'eki tiaque ema mi peje su ecuinati puji.

Da su Jesús ja --Pueque --ataidha Pedro.

Pedro canoa jenetia cuina putsu, ena bia je asepiruidha Jesús peje su ecuinati puji. Da hora su Pedro ja ena putsua ba putsu, rubutanapiruidha. Ena su nubipiruidha. Da su Pedro ja Jesús jubida jejetaidha uja:

--;Echua Puji! D'eki su ema aque, ehuidi da ema putsu.

Da su Jesús ja Pedro sa eme ina putsu, uja ataidha:

--Pishihue mique ema peje su janimetucheati cuana.

Ema peje su jubida janimetucheati taji.

Da su beju betana su canoa su nubidha. Da hora su beni mitanaidha.

Discípulo cuana Jesús butse su tururu putsu, uja ataidha
huecuana:

--Enei hue tuque mi Diusu sa Ebacua.

1. ¿Jucuaja su Jesús mue anipetuti discípulo cuana neje canoa
aida su? _____
2. ¿Jucuaja su discípulo cuana rubutanataidha, Jesús ena bia je
yaseni ba putsu? _____
3. ¿Aidhe asetidha ena bia je Jesús peje su? _____
4. ¿Quetsunu beni mitanaidha? _____

Jabuetsuatique versículo Mateo 14.33.



Mimiamemeque Mateo 17.1-9; Marcos 9.2-13; Lucas 9.28-36.

Piada tsine Jesús mesa quimisha discípulo cuana neje emata su tsuatinha. Pedro, Jacobo, Juan cuana Jesús neje putidha. Beju Jesús Tata Diusu neje emitsutiani su, mesa ebu, ejud'uchi cuare cuare puidha. Beta deja tu naja su bataji puidha. Tuatseda Moisés, Elías puina. Daja ba putsu, Pedro ja uja Jesús ataidha:

--Echua Puji, saida ecuaneda upia yani puji. Quimisha ete pacha paatija micuaneseda puji.

Pedro daja emimiani cama, judu cuare cuare ja dunutaidha huecuana. Judu jenetia Diusu uja ataidha huecuana:

--Ye da quema ibuneda Ebacua. Meid'abaque tueda.

Daja id'aba putsu, rubutanadajajataidha huecuana. Da su Jesús ja uja ataidha huecuana:

--Menetianaque. Be merubutanaji.

Beju chamataidha huecuana su, Moisés, Elías detse ai mahue beju. Jesús bahui eneti bataidha huecuana. Equene puina nime puibana bataidha huecuana.

1. ¿Quepia Jesús ja discípulo cuana dusutaidha Diusu neje emitsuti puji? _____
2. ¿Quejucua discípulo cuana dusutaidha? _____
3. ¿Aidhe detse Jesús naja su bataji puidha? _____
4. Judu jenetia ¿jucuaja Diusu ja discípulo cuana ataidha?
¿Diusu ja aidhe paid'abata huecuana ataidha? _____

Mimiameque Marcos 10.46-52; Lucas 18.35-43.

Piada tsine Jesús dueji cristiano cuana neje Jericó ejude jenetia cuinanaidha. Edid'i buahua su piada deja padha anidha Bartimeo banime. Chipilu bajaji puina. Da su Jesús enariatiani id'aba putsu, jubida tsiatsiapiruidha uja:

--¡Jesús, ibunebaque ema!

Jesús neje epuniuneti cuana ja d'ayatana deja.

--Mitanaque --ataidha huecuana.

Deja padha cha bia su hue tsiatsiaidha. Da su Jesús ba putsu, deja padha ihuataidha. Jesús peje su padha janariatidha su, Jesús ja uja ataiha:

--¿Ai ni mique yama cuaja a cua?

Uja padha ja jeutsutaidha:

--Jabatija da ema.

Da su Jesús ja padha uja ataidha:

--Puchiditiuque. Saisitia mi beju, ema peje su jei puitia putsu.

Da hora su Bartimeo jabati putsu, Jesús tije apirutaidha.

1. ¿Ai ni banime puina deja padha? _____
2. ¿Queapia anina deja padha, Jesús id'abataidha su? _____
3. ¿Jucuaja su dapia anidha? _____
4. ¿Queapia putidha, jabati putsu? _____

Jabuetsuatique saida versículo Mateo 14.33.

Mimiamemeque Juan 10.

Uja Jessús ja cristiano cuana buetsuataidha:

--Huisha quinaji saida ja mesa huisha eshanapatani. Huisha cuana ja tusa etsui eshanapatani, tuahueda eihuatan su. Pamapa tsine taraca etsequeini je ecuinanametani diadia jaid'iti paputa puji. Seje putsu, ejanahuatan cama, huisha quinaji ja einatsihuatan.

'Cuapuitime piada huisha taitana cua putsu, animalo d'aida ja diata cua. Daja huecha neda jaati cua, rara su dajaja putsu. Huisha quinaji saida ja mu pamapa mesa huisha quitana eshanapatani. Ahua piada taitana cua su, huisha quinaji ja echacutani eteje puji. Teje putsu, ebai su edusutaniyu pia cuana duju su. Tsinecua su pamapa huisha cuana taraca su eichanubiametani. Huisha quinaji saida ja pamapa mesa huisha cuana ebia su ibuneda ebatani.

Uja Diusu sa mimi epuani Isaías 52.6 su:

Pamapa ecuaneda da huisha jeitid'ujiji nime.

Pamapa ecuana sa piba su quitaita bahui puniunetina.

Cuaja huisha quinaji ja mesa huisha cuana ebia su ibuneda ebatani nime, daja Jesús ja ecuana ebia su ibuneda ebatani. Einatsihuata ecuana, ahua ecuaneda tu peje su jei epu su. Ishahua jenetia ecuana ebianetiatani, ecuana sa Huisha Quinaji Saida putsu.

1. ¿Cuaja huisha quinaji saida ja mesa huisha cuana quiname yataní? _____
2. ¿Jucuaja su rejada, piada huisha ejeitid'uani su? _____
3. ¿Aidhe da ecuana sa Huisha Quinaji Saida? _____
4. ¿Aidhe cuana da huisha nime? _____

Jabuetsuatique versículo Juan 10.11.



Mimíameque Lucas 10.30-37.

Jesús ja cristiano cuana bahue quisa neje buetsuataina. Piada nuati buetsuataidha huecuana cuaja pia cuana ibuneda ba taji. Uja buetsuataidha huecuana Jesús ja:

--Piada tsine piada deja Jericó ejude jenetia Jerusalén ejude su putiana. Edid'i su tsi puji cuana ja deja metsitana. Ejud'iji pamapa metsi putsu, ichetana huecuana ebia su. Emanu pad'i pad'i jusiahuanatana huecuana. Da tsine su huecha piada sacerdote jaitianana. Deja edid'i buahua su esa ba putsu, pejaitianatana. Mue ibuneba biame. Da su beju piada templo etsahuaji pueana. Deja ichenu esa batana biame, tueda di butsepi jaitiana puana. Da su piada samaritano deja pueana. Judío cuana ja samaritano cristiano tsada mahue bataina biámé, tuahueda deja ichenu esa ba putsu, ichenubatana. Iche etsi cuana iduene putsu, babutana. Mesa animalo bia su deja ichenu ichatsua putsu, ecuinatiji ete su dusu putsu, chujetiatana ete emetse saida deja paquinata puji esajisi teje.

1. Chacuque Jericó, Jerusalén ejude detse mapa su.

2. ¿Quebata detse ja deja esa su pejaitianatana? _____

3. ¿Aiya deja tsahuatana? _____

4. ¿Ai ecuana ebuetsuatani ye bahue quisa ja? _____

Jabuetsuatiue saida versículo Juan 10.11.



Mimiamque Lucas 15.11-32.

Jesús ja pia bahue quisa buetsuataidha cuaja Diusu ja ecuana ebia su ibuneda ebatani ebame puji. Uja Jesús ja cristiano cuana buetsuataidha:

--Piada deja beta bacuame anina. Tije puji ebacua ja uja mesa tata atana: "Tata, pamapa mique ai cuana jenetia quema tupu ema tiaque jiahue quita, mi manuji mahue su hue." Da su tata ja betana ebacua detse mesa chipilu sajatiatana. Tije puji ebacua inatsu putsu, tata sa ete jenetia cuinana. Pamapa mesa chipilu apetana pia ejude su, pamapa mesa ai utsatada madhada cuana yainia je. Chipilu mahue jabati putsu, mudumudupiruana. Cuchi quinaji mesa mudu pupiruana. Da su beju uja pibapibana: "Quema tata sa ete su emebajaji cuana ema ebia su saida ediadiatani. Da su ema quema tata peje su pasiapatiyu. Cuipuitime ema einatsuta emebajaji nime." Da su tije puji ebacua tata peje su jasiapatibana. Tata ja ebacua uqueda su hue ba putsu, jududutiana tu etsunetia puji. Tsuneti putsu, id'amitana. Da su ebacua ja uja tata atana: "Tata, juchaji da ema puitia Diusu butse su, daja huecha mi butse su. Be ema baji mique ebacua nime." Daja biame, tata ja ejud'iji saida dusemetana ebacua sa puji, ebia su beidaji puana putsu. Metara di ebacua sa yatsa su ichatana. Huaca manuametana tsine epu puji. Daja tata ja atana, mesa ebacua jasiapatiana putsu.

Ye bahue quisa ja cuaja Diusu ja ecuana ebia su ibuneda ebatani ecuana ebuetsuatani. Diusu ja juchaji cuana einatsihuataní, epibaturucatitaní huecuana su.

1. ¿Ai su tije puji ebacua ja mesa chipilu apetana? _____
2. ¿Jucuaja su ete su jasiapatibana? _____
3. ¿Cuaja mesa tata ja inatsume atana? _____
4. ¿Ai ecuana ebuetsuatani ye bahue quisa ja? _____

Jabuetsuati que versículo 2 Corintios 7.10.



Mimiamemeque Juan 11.1-45.

Edue María, Marta, Lázaro cuana Jesús sa eshanapa cuana putaina. Betania ejude su anitaidha huecuana. Piada tsine Lázaro nedaji puina. Jesús pia ejude su anidha. Da su Lázaro sa edue detse quisametaidha Jesús papue puji, Lázaro esaisiame puji. Jesús, Lázaro ebia su ibuneda ba biame, mue tipeida puti. Beta tsine jenetia chamacama discípulo cuana uja ataidha:

--Meputija Lázaro peje su.

Betania ejude su cuinana su, Lázaro beju pushi tsine papajiji bataidha huecuana. Marta ja Jesús epusiu ba putsu, cuinanana tu etsuneti puji. Uja Marta ja Jesús ataidha:

--Echua Puji, mi upia ani su mu, aimue quema edue manu cua puina mahue. Daja biame, bahue ema pamapa mi ebaja cuana Diusu ja etiata.

Jesús ja uja jeutsutaidha Marta:

--Mique edue neicha eid'e epu.

Da su Marta ja uja ataidha:

--Ehe, bahue ema tiempo epupe su, pamapa manujiji cuana enetianata.

Jesús ja uja ataidha Marta:

--Ema da manujiji cuana eid'e ameji. Quebata ema peje su jei epuani su, emanu biame, beju neicha eid'eyu.

'Pamapa eid'e ema peje su jei eputani cuana di, manu putsu, aimue emanuenita huecuana mahue. ¿A mi ye quema mimi su jei epuani?

Da su Marta ja jeutsutaidha uja:

--Ehe, Echua Puji, mida da Diusu sa Ebacua. Mida da Diusu sa Jabeituti Deja ecuanaju id' uaitia.

Da su beju Jesús dusutaidha huecuana Lázaro papajiji esa su.

Jesús ja tumu pajemiderata huecuana cuatsasiataidha. Da su Marta ja ataidha:

--Echua Puji, beju jia huaniji, pushi tsine manujiji putsu.

Daja biame, Jesús ja daja hue cuatsasiaderataidha. Da su beju Jesús ja Tata Diusu mitsutaidha. Mitsupe putsu, uja puidha:

--; Lázaro, cuinanaque!

Da hora su beju manujiji cuinanaidha dhiri ped'u neje babujiji.

Tueda nimetiuda neje Jesús manu ebia su tucheda bametidha.

1. ¿Cuaja banime putana Lázaro sa edue epuna detse? _____
2. ¿Quejucua tsine Lázaro manujiji saidha? _____
3. ¿Aiya Jesús tsunetiatida?
4. ¿Aidhe manu ebia su tucheda? _____

Jabuetsuatique saida versículo 2 Corintios 7.10.



Mimiamemeque Mateo 19.13-15; Marcos 10.13-16; Lucas 18.15-17.

Piada tsine cristiano cuana ja yanana chidi cuana Jesús peje su dusetaidha tusa eme tuna bia su pahuanata puji. Discípulo cuana ja d'ayataidha huecuana. Jesús mu id'aba putsu, duininidha. Uja ataidha discípulo cuana:

--D'eji metiaque yanana chidi cuana ema peje su papueta, Diusu ecuatsasiati da tuna nime sa putsu. Quebata Diusu ecuatsasiati nubija su, equene yanana chidi nime pu taji.

Da su Jesús ja yanana cuana mesa ebai detse neje dhitataidha. Mesa eme tuna bia su huana putsu, ibunebataidha huecuana.

1. ¿Jucuaja su cristiano cuana ja yanana cuana Jesús peje su dusetaidha? _____
 2. ¿Cuaja putaidha discípulo cuana? _____
 3. ¿A da Jesús ja yanana chidi cuana baja ataidha? _____
 4. ¿Cuaja Jesús ja yanana chidi cuana ataidha? _____
-

Jabuetsuatique versículo Mateo 19.14.



Mimiamameque Lucas 19.1-9.

Piada tsine Jesús Jericó ejude su putidha. Dapa piada deja Zaqueo banime Jesús baja puidha. Tueda da impuesto chujebajaji puina. Deja ubu chidi putsu, cuaja ba taji mahue Jesús bataidha, dueji cristiano cuana anidha putsu. Da putsu, aqui su tsuaidha da jenetia Jesús echama puji. Jesús aqui ema je ejaitianasa je, Zaqueo aqui su ebade bataidha. Uja Jesús ja ataidha Zaqueo:

--Zaqueo, buteque. Ema mique ete su jiahue eputi.

Zaqueo tipeida bute putsu, beidaji neje Jesús dusutana mesa ete su. Da putsu, dapia aniji cristiano cuana mimicuicuinataidha uja:

--Jesús juchaji sa ete su epuhu.

Da su Zaqueo ja Jesús uja ataidha:

--Echua Puji, quema chipilu edusete puri cristiano cuana yama etia. Pamapa yama baseana cuana pushi nuati yama eturucayu.

Da su Jesús ja Zaqueo uja ataidha:

--Jiahue beju mida d'eji su epuani. Ema Diusu jenetia pueitia mi nime juchaji cuana d'eji su ya puji.

1. ¿Jucuaja su Zaqueo aqui tsuaidha? _____
2. ¿Zaqueo sa ai mudu puina? _____
3. ¿Jucuaja su cristiano cuana ja Zaqueo duininibataidha? _____

4. ¿Quepia putidha Jesús Zaqueo neje? _____

Jabuetsuatique saida versículo Mateo 19.14.

Mimiamemeque Mateo 26.6-13; Marcos 14.3-9; Juan 12.1-8.

Pascua tsine cuinaji mahue su, Betania ejude su aniji cuana ja Jesús ihuataidha ediadia puji. Dapia María, Marta, Lázaro cuana di anitaidha. María ja Jesús ebia su ibuneda ba putsu, litro edusete chujeneda saida puida dusetaidha Jesús sa ehuatsi bia su ed'uicha puji. Tueda puida ebia su chujeneda puina. Da su Jesús butse su tururu putsu, puida ehuatsi bia su d'uichataidha. Mesa echuaina neje muriataidha. Ete dume puida neje sejeataidha. Judas Iscariote ja mu tsada mahue bataidha. María d'ayataidha jubida. Uja puidha Judas:

--Ye puida piada mara pucue mudu chuje tupu. ¿Jucuaja su ni da aimue iruitia mahue puri cuana etsahua puji? Ye epuna ja chad'uicha hue ataitia beju.

Daja Judas puidha, tsi puji putsu, aimue puri cuana tsahuaja putsu mahue. Tueda da discípulo cuana sa chipilu quinaji puina putsu, chipillu shitara su tsi bahue puina. Da su Jesús ja Judas uja ataidha:

--Be daja aji María. Quema saida puji daja ataitia. Puri cuana da pamapa hora su yanita. Ema mu micuana neje daja yani mahue. Ye epuna ja quema equita puida neje papitaitia quema manu tsine cuinaji mahue su ema emanu pu cua nime.

1. ¿Quepia Jesús diadiatidha? _____
2. ¿Aidhe cuana Jesús neje dapia anitaidha? _____

3. ¿Aiya Jesús sa ehuatsi puida neje biad'uichataidha? _____
4. ¿Jucuaja su Judas ja María d'ayataidha? _____
-

Jabuetsuati que versículo Mateo 26.13.



Mimiamemeque Mateo 26.1-5,14-16; Marcos 14.1-2,10-11; Lucas 22.1-6.

Pascua tsine beju quitaita su, uja Jesús ja mesa discípulo cuana quisataidha:

--Beta tsine Pascua tsine ecuaneda eba. Da su beju ema deja madhada ja curusu su etatata.

Jesús daja emimiani hora su sacerdote cuana sa echua puji, tata edhi cuana jadhitatitaidha cuaja Jesús manuameme ya puji equisati puji. Uja jaquisatitaidha huecuana:

--Aimue ecuaneda tsine su quitaita Jesús eina mahue, cristiano cuana detse tipeinetianata cua putsu.

Da su Ishahua ja Judas pibametaidha cuaja Jesús menajatiame ya puji. Judas piada discípulo puina biame, sacerdote cuana sa echua puji cuana peje su putidha cuaja Jesús iname yata huecuana equisa puji. Id'aba putsu, sacerdote cuana beidaji putaidha. Judas quimisha tunca chipilu cuana tiataidha huecuana. Da hora jenetia Judas ja ai hora jia Jesús tu mehua epu id'uataidha sacerdote cuana tipeida equisati puji, Jesús painata huecuana puji.

1. ¿Cuaja Jesús manume epu? _____
2. ¿Aidhe cuana ja Jesús manuameja ataidha? _____

3. ¿Quebata discípulo ja Jesús menajatiataidha? _____
4. ¿Quejucua chipilu sacerdote cuana ja Judas tiataidha? _____

Jabuetsuatiche versículo Mateo 26.1-2.



Mimiamemeque Mateo 21.1-11; Marcos 11.1-17; Lucas 19.28-44;
Juan 12.12-19.

Dueji cristiano cuana Jerusalén ejude su putitaidha Pascua tsine eba puji. Jesús eupsiu bahue putaidha huecuana su, ejude jenetia cuinanataidha tu etsunetia puji. Jesús Betfagé ejude chidi naja su cuinatidha su, beta mesa discípulo detse tueda ejude chidi su beitutaidha. Uja ataidha tse:

--Meputique Betfagé ejude chidi su. Dapia asunu janana eneti eba. Pidhu putsu, meduseque. Ahua aiya emetse, "¿Jucuaja puji metse daja yainia su?" yata su, uja mequisaque tueda: "Echua Puji ja etsatani. Tipeida ebeitutayu."

Da su putidha tse. Cuaja Jesús puidha batame, daja ataidha tse. Asunu janana Jesús peje su dusu putsu, mecuana sa ebia jud'uji asunu janana bia su ichatsuataidha. Discípulo cuana ja Jesús ja asunu chidi biani putsu, Jerusalén ejude su putitaidha huecuana. Tu tsunetiaji cristiano cuana ja tumi nime sa ebai cuana Jesús epuhu edid'i hui su huanataidha huecuana. Pia cuana ja mecuana sa ebia jud'uji cuana di edid'i su huanataidha. Uja tsiatsiataidha huecuana:

--;Gloria, Tata Diusu sa Jabeituti Deja epusiu!.

Jesús ejude nubidha su, piada piada cuana uja quisabataidha:

--¿Aidhe jia ye deja?

Pia cuana ja uja jeutsutaidha:

--Tueda da profeta Jesús banime Galilea yahua Nazaret
ejude jenetia.

1. ¿Aidhe cristiano cuana ja tsunetiataidha? _____
2. ¿Ai bia je Jesús ejude su nubidha? _____
3. ¿Ai huanataidha cristiano cuana ja edid'i su? _____

4. ¿Jucuaja japibatitaidha cristiano cuana Jesús jepuiti? _____

Jabuetsuatique versículo Mateo 21.9.



Mimiamemeque Mateo 26.17-35; Marcos 14.12-31; Lucas 22.7-23;
Juan 13.21-38.

Pascua tsine epupiru su, cristiano cuana huisha janana manuame bahue putaina. Daja huecha pan levadura mahue a bahue putaina huecuana. Da su Jesús ja beta discípulo detse piada ete su beitutaidha tsine pabata tse puji. Dhidha su Jesús ja discípulo cuana neje tueda ete su tsine jana diataidha. Dapia tuna yanita su, Jesús neti putsu, mesa ebia jud'uchi jemitaidha. Paño neje jatimairisitidha. Da su emeji su yahui icha putsu, discípulo cuana sa ehuatsi rucuapirutaidha. Da neje discípulo cuana huamahuama jameabajati taji Jesús ja bametaidha. Daja ape putsu, Jesús ja ataidha huecuana uja:

--Piada ja micuaneseda ema emenajatia.

Da su discípulo cuana ebia su jatacuamadhatidha, Jesús sa mimi cuana id'aba putsu. Uja Jesús quisabataidha huecuana:

--Echua Puji, ¿aidhe da?

Chamacama Judas ja Jesús quisabataidha:

--¿Ahua ema?

Jesús ja jeutsutaidha uja:

--Ehe, mida da. Mi aja yainia tipeida atique.

Da su beju dhidha su Judas cuinanaidha. Pia discípulo cuana mu anitaidha tsine jana ediape puji. Jesús pan ina putsu, diusulupai Tata Diusu ataidha. Pan ped'u putsu, discípulo cuana berereatiataidha. Uja ataidha huecuana:

--Ye pan da quema equita pu cua nime micuaneseda puji
irutsuajiji epu.

Daja huecha vino emeji berereatiataidha. Uja ataidha huecuana:

--Ye vino da quema ami pu cua nime d'uichajiji epu
micuaneseda puji. Tueda ami d'uichajiji jepuiti Diusu ja mesa
jamitsuti eichacua cristiano cuana etiata. Tueda ami jepuiti
Diusu ja dueji cristiano cuana d'eki su yata. Meid'ipeque, ema
piba putsu.

Da su beju tsine jana diape putsu, Olivo Emata su putitaidha
huecuana. Dapia Jesús ja uja ataidha huecuana:

--Micuaneda pamapa ema mehua ejusianetia ye dhidha su.

Da su Pedro ja uja ataidha Jesús:

--Pia cuana ja mi ejusianetiata biame, yama mu mahue.

Jesús ja Pedro ataidha:

--Da su jia mida ema jepuiti manuja. Yama mi equisainia, ye
dhidha su quitaita quimisha nuati mida, "Mue yama Jesús shanapa,"
epu. Huaripa deja queiji mahue su, daja mida epu.

Pedro ja mu mue jei su puidha.

1. ¿Ai judío cuana ja diataidha Pascua tsine equene? _____
2. ¿Cuaja Jesús ja discípulo cuana huamahuama jameabajati taji
bametaidha? _____
3. ¿Ai mecuana sa dia taji, id'i taji Jesús epiba puji? _____
4. ¿Quebata discípulo cuana ja Jesús menajatiataidha? _____

Mimiamemeque Mateo 26.36-75; Marcos 14.32-72; Lucas 22.39-71;
Juan 18.1-27.

Tueda dhidha Getsemané banime eti jude su putitaidha huecuana. Dapia Jesús tu mehua putidha chuadera pad'i Tata Diusu neje emitsuti puji. Jubida bajataidha Diusu patsahuata puji. Uja Jesús ja Diusu ataidha:

--Tata, d'eji su aque ema curusu su sufrimiento cuana jenetia, ahua mique tsada su. Daja biame, be quema tsada mu papu.

Jesús da curusu su ebade su Tata Diusu ja tueda emesiata bahue puidha. Da putsu, daja Diusu bajataidha jubida neje. Ebia su jatacuamadhatidha, mesa Tata neje emitsutiani cama. Diusu mitsupe putsu, discípulo cuana peje su jasiapatidha. Tuna peje su cuinati putsu, etahuitasa bataidha huecuana.

Id'edea putsu, uja ataidha huecuana:

--¿Jucuaja su micuaneda etahuisa? Menetianaque. Meputija. Beju ema menajatiaji deja ecuina pia cuana neje ema eina puji.

Da hora su cuinataidha huecuana. Judas ja Jesús budhitaidha. Da su Jesús ja Judas uja ataidha:

--¿Budhi neje miada ema emenajatiainia?

Pia deja cuana uja ataidha Jesús ja:

--¿Ai puji ni da micuaneda pueitia espadaji, aquiriji metse cama? Pamapa tsine micuana duju su templo su yama buetsuaina biame, aimue ema inana mahue.

Da su deja cuana ja Jesús ina putsu, dusutaidha. Sacerdote cuana sa echua puji sa ete su dusutaidha huecuana. Da su beju discípulo cuana juddudutaidha. Jesús jusianetiataidha huecuana pamapa. Pedro ja mu uqueda uqueda tije ataidha Jesús sacerdote aida sa ete etseque teje. Etsequeini eteriji quinaji ja Pedro ba putsu, uja quisabataidha:

--¿A mida jia Jesús sa piada discípulo?

Da su Pedro ja jeutsutaidha:

--Mahue. Mue yama tueda shanapa.

Beta nuati neicha daja jeutsutaidha Pedro ja. Da hora su huaripa deja beta nuati queidha.

1. ¿Ai epu puji Jesús Getsemané eti jude su putidha? _____

2. ¿Cuaja putaidha discípulo cuana dapia? _____

3. ¿Ai neje Judas ja Jesús menajatiataidha? _____

4. ¿Quejucua nuati Pedro, "Mue shanapa Jesús," puidha? _____

Jabuetsuati quejucua versículo Juan 3.16.



Mimiamemeque Mateo 26.59-67 y 27.11-30; Marcos 14.53-65 y 15.1-20;
Lucas 22.63 a 23.24; Juan 18.12-14 y 19-24 y 28 a
19.16.

Tata edhi cuana, sacerdote aida cuana jadhitatitaidha Jesús equisaba puji. Tusa jabuetsuati cuana jepuiti quisabataidha huecuana. Jesús ja uja jeutsutaidha huecuana:

--Pamapa cristiano cuana butse su yama ajiji. Mue ai biame quema rubuajiji. Quisabaque quema jabuetsuati id'abaji cuana quema jabuetsuati cuana da saida ahua mahue.

Da su beju piada soldado ja Jesús buahuaichetaidha. Uja ataidha Jesús:

--Be daja jeutsuji sacerdote aida.

Jesús pamapa ai cuana jepuiti tuaquisapirutaidha huecuana. Jatuaquisatiji cuana ihuataidha huecuana Jesús ai bid'umimi cuana etuaquisa puji, manu neje ematseta puji. Daja biame, aimue teje ataidha huecuana tu ematse puji. Chamacama sacerdote aida ja uja quisabataidha Jesús:

--Quisaque ecuanaju butsepi. ¿A da mida Diusu sa Ebacua?

Da su Jesús ja uja jeutsutaidha huecuana:

--Ehe. Ema da.

Daja id'aba putsu, sacerdote aida ja pia cuana uja ataidha:

--Ye deja ja Diusu madhabataitia, "Diusu sa Ebacua da ema," puitia putsu. Ai puji ecuana sa tsada pia jatuaquisatiji cuana, micuaneda quitaita beju id'abaitia putsu.

Da su beju Jesús jubida iche putsu, romano huaraji aida Pilato butse su dusutaidha huecuana. Tu butse su tuaquisataidha Jesús. Tueda mu mue jibiahanati. Da su Pilato ja cristiano cuana quisabataidha uja:

--¿Ai ni da ema pu cua Jesucristo neje?

Pamapa su tsiatsiataidha uja:

--Curusu su tataque.

Pilato bahue puina Jesús deja madhada mahue puina biame, menajatiataidha soldado cuana ja patatata puji. Da su soldado cuana ja Jesús nedaneda ataidha. Daja huecha tu neje jashishatitaidha huecuana. Huaraji sa ebia jud'uji neje jud'u putsu, id'ebataidha huecuana. Junu aquid'aji bauda jenetia neje Jesús chuajud'u putsu, tu butse su tururutaidha huecuana. Shishape putsu, Jesús dusutaidha huecuana curusu su etata puji.

1. ¿A da Jesús tueda quitaita Diusu sa Ebacua puidha? _____
2. ¿Ai ni banime romano huaraji aida? _____
3. ¿Cuaja Jesús paata huecuana cristiano cuana sa tsada puidha? _____

4. ¿Cuaja soldado cuana ja Jesús ataidha? _____

Jabuetsuati que versículo 1 Pedro 2.24.



Mimiamemeque Mateo 27.32-66; Marcos 15.21-47; Lucas 23.26-56;
Juan 19.17-42.

Beju soldado cuana ja Jesús tusa curusu mapamedhaataidha tata bahue eti jude teje. Mue mapa ataidha Jesús ja, mesa equita pishihue jabatidha putsu. Da su pia ja curusu mapataidha Jesús sa puji. Eti jude su cuinati putsu, Jesús tatataidha huecuana. Tusa bai eni bene, d'ani bai bene beta curusu su tsi puji detse badeanataidha huecuana. Piada tsi puji ja Jesús madhabataidha. Pia ja mu uja ataidha Jesús:

--Jesús, pibaque ema, mi ecuatsasiati su ecuinati su.

Jesús ja tsi puji uja jeutsutaidha:

--Jiahue tsine mida ema neje cielo su yaniti.

Jesús curusu su ebade tupu, tu ema je jaitianaji cristiano cuana ja tu neje jashishatitaidha. Beju buepatia puidha su, pamapa apunaidha quimisha hora puji. Quimisha hora jenetia Jesús jubida tsiatsiaicha uja:

--Quema Tata, ¿jucuaja su mi ema jusiabadeanaitia?

Da su beju neicha uja Diusu ataidha:

--Tata, yama quema enid'u mi emenajatiainia.

Da su tsiatsia jubida neje manuidha. Da hora su templo dume su telon aida, baula, pamuda badeji ebia su jenetia ema su cuata jabud'iutiana. Yahua di ruburubuidha. Jesús sa eshanapa cuana ja pamapa bataidha. Soldado ja lanza naja Jesús sa atsupa su d'acuataidha.

1. ¿Jucuaja su Jesús pishihue jabatidha? _____

2. ¿Cuaja curusu su badeaname ataidha huecuana? _____

3. ¿Cuaja puidha buepatia su? _____

4. ¿Cuaja puidha templo su badeji telon? _____

Jabuetsuati que saida versículo 1 Pedro 2.24.



Mimiamemeque Mateo 27.57 a 28.20; Marcos 15.42 a 16.13;
Lucas 23.50 a 24.49; Juan 19.38 a 20.25.

Piada deja chipiluji ja huaraji Pilato Jesús sa equita bajataidha. Pilato ja jade ataidha su, equita curusu jenetia jemiutetaidha. Deja ja mesa tumu epa su ajiji rara su huanganubiataidha. Da su Jesús sa equita basetataidha huecuana epapa puji. Papa putsu, tumu aida pachata neje rara teritaidha huecuana. Judío cuana sa tata edhi cuana ja Pilato bajataidha soldado cuana rara tsequeini painatsihuata puji, aimue aiya biame equita patsita mahue puji. Da su daja ataidha Pilato ja. Quimisha tsine jenetia apudaya enieni quimisha epuna cuana Jesús huanganubiajiji su putitaidha tusa equita ena puida neje ya puji. Cuinati putsu, nimetiunetitaidha huecuana, sepulcro eteriji tumu aida ichaderajiji ba putsu. Aimue Jesús sa equita bataidha huecuana. Dapia piada ángel netidha. Uja ángel ja ataidha huecuana:

--Be merubutanaji. Aimue beju Jesús upia mahue, tueda id'eibana putsu. Mequisatique discípulo cuana.

Da su epuna cuana tipeida jududuídha pia cuana equisati puji. Tuneda id'aba putsu, sepulcro su putitaidha ebatí puji. Da su beju Jesús da María, discípulo cuana pia cuana'peje su di jabametidha.

1. ¿Quepia Jesús sa equita huananubiataidha huecuana? _____
2. ¿Quejucua tsine puji Jesús sa equita sepulcro su saidha? _____
3. ¿Aidhe eneti epuna cuana ja sepulcro dume su bataidha? _____
4. ¿Aiya Jesús bataidha, tu id'eibana su? _____

Jabuetsuatique versículo Marcos 16.6.



Mimiamemeque Lucas 24.50-53; Hechos 1.1-11.

Pushi tunca tsine jenetia Jesús ja mesa discípulo cuana Olivo emata su dusutaidha. Discípulo cuana ja Jesús uja quisabataidha:
 --¿Quetsunu mi ecuatsasia epu ye mundo su?

Da su Jesús ja uja jeutsutaidha huecuana:

--Tata Diusu bahui bahue. Micuaneda mu Jerusalén ejude su id'ua taji yama Espíritu Santo micuana peje su ebeitu teje.

Jesús quisape putsu, cielo su tsuatibana. Judu duju su taitanaidha. Mue baderayu huecuana. Buepa huabata echamatitaneti huecuana cama, beta deja jud'uchi pasaneji detse jabametidha tuna naja su. Tuatseda uja ataidha huecuana:

--¿Jucuaja micuaneda buepa huabata echamachamaneti? Jesús huecha hue esiapatiyu, cuaja micuaneda etsuabuyu baitia nime.

Da putsu, jiahue tsine Jesucristo peje su jei eputani cuana ja ai hora papu Jesús enimeid'uatani, aimue aidhe biame quetsunu esiapati bue mahue putsu.

1. ¿Quejucua tsine Jesús yahua su puniunetibaidha, id'eiyu putsu? _____
2. ¿Quepia Jesús ja discípulo cuana dusutaidha cielo su etsuatiyu tsine su? _____
3. ¿A da Jesús epueicha ye mundo su? _____
4. ¿Quetsunu epueicha? _____

Jabuetsuatiique versículo Hechos 1.11.



LA PALESTINA del Nuevo Testamento

0 10 20 30 40 50
KILOMÉTROS

